



EUROPEAN COURT OF HUMAN RIGHTS
COUR EUROPÉENNE DES DROITS DE L'HOMME

ČETVRTI ODJEL

ODLUKA

Aplikacija br. 14769/15
Jelenko GRAHOVAC
protiv Bosne i Hercegovine
(vidi tabelu u dodatku)

Evropski sud za ljudska prava (Četvrti odjel), zasjedajući dana 12.09.2019. godine kao odbor u sljedećem sastavu:

Stéphanie Mourou-Vikström, *predsjednica*,
Georges Ravarani,
Jolien Schukking, *sudije*,

i Liv Tigerstedt, *vršiteljica dužnosti registrara Odjela*,
povodom navedene aplikacije podnesene dana 12.03.2015. godine,
imajući u vidu izjašnjenja koja su dostavile stranke,
nakon vijećanja, odlučio je kako slijedi:

ČINJENICE I POSTUPAK

Lični podaci aplikanta navedeni su u tabeli u dodatku.

Aplikanta je zastupao g. D. Pejaković, advokat iz Banjaluke.

Pritužbe aplikantata iz člana 6. stav 1. Konvencije koje se tiču prekomjerne dužine krivičnog postupka dostavljene su vladi Bosne i Hercegovine („vlada“) dana 9.06.2017. godine.

PRAVO

Vlada je istaknula da je aplikant propustio obavijestiti Sud da su u krivičnom postupku o kojem je riječ donesene tri presude nakon podnošenja ove aplikacije. Stoga je predložila da Sud odbaci aplikaciju zbog zloupotrebe prava na podnošenje pojedinačne aplikacije u skladu sa članom 35. stavovi 3. (a) i 4. Konvencije.

Aplikant nije osporio tu činjenicu, ali je smatrao da je ona irelevantna.

Sud ponavlja da se aplikacija može odbaciti zbog zloupotrebe prava na podnošenje pojedinačne aplikacije u smislu člana 35. stav 3. (a) Konvencije ako je, među ostalim razlozima, svjesno zasnovana na netačnim

informacijama ili ako su značajne informacije i dokumenti namjerno izostavljeni, bilo da su bili poznati od samog početka ili da je tokom postupka došlo do značajnog novog razvoja događaja. Nepotpune, te samim time i obmanjujuće informacije mogu predstavljati zloupotrebu prava na podnošenje aplikacije, naročito ako se informacija o kojoj je riječ odnosi na samu suštinu predmeta, a nije pruženo dostatno objašnjenje za propust da se ta informacija saopšti (vidi *Gross protiv Švicarske* [VV], br. 67810/10, tačka 28., ESLJP 2014.; *S.A.S. protiv Francuske* [VV], br. 43835/11, tačka 67., ESLJP 2014.; i *Matović protiv Srbije* (odl.) [Odbor], br. 33104/16, 25.09.2018.).

Vraćajući se predmetnom slučaju, Sud primjećuje da su domaći sudovi donijeli tri presude u ovom predmetu dana 21.08.2015., 8.11.2016. i 24.02.2017. godine, kojima je aplikant pravosnažno oslobođen krivice. Aplikant nije obavijestio Sud o ovim činjenicama prije nego što je vlada dobila obavijest o aplikaciji, a nije pruženo uvjerljivo objašnjenje za taj propust.

S obzirom na činjenicu da se uskraćena informacija odnosi na samu suštinu aplikacije, Sud smatra da je takvo postupanje suprotno svrsi prava na podnošenje pojedinačne aplikacije kako to propisuje Konvencija. Advokati moraju razumjeti da, uzimajući u obzir dužnost Suda da ispituje navode o povredama ljudskih prava, oni moraju pokazati visok stepen profesionalne razboritosti i sadržajne saradnje sa Sudom, na način da ga poštede od podnošenja neopravdanih pritužbi, te da se i prije pokretanja postupka, kao i nakon toga, moraju savjesno upoznati sa svim detaljima predmeta, pažljivo se pridržavati svih relevantnih pravila postupka, te isto zahtijevati i od svojih klijenata. U suprotnom, zloupotreba resursa Suda, bilo svjesno ili kao posljedica nemara, može narušiti vjerodostojnost rada advokata u očima Suda i čak, ukoliko se to dešava sistematski, može dovesti do izricanja zabrane zastupanja aplikanta pojedinim advokatima u skladu s pravilom 36. tačka 4.(b) Pravila Suda (vidi *Stevančević protiv Bosne i Hercegovine* (odl.), br. 67618/09, tačka 29., 10.01.2017.).

U svjetlu navedenog, Sud smatra da predmetna aplikacija predstavlja zloupotrebu prava na podnošenje pojedinačne aplikacije u smislu člana 35. tačka 3.(a) *in fine* Konvencije. Ona se stoga mora odbaciti prema članu 35. tačke 4. Konvencije.

Iz navedenih razloga, Sud jednoglasno,

Prolašava aplikaciju nedopuštenom.

Sačinjeno na engleskom jeziku i dostavljeno u pisanom obliku dana 3.10. 2019. godine.

Liv Tigerstedt,
vršiteljica dužnosti zamjenika registrara

Stéphanie Mourou-Vikström,
predsjednica

DODATAK

Aplikacija s pritužbama prema članu 6. stav 1. Konvencije

(prekomjerna dužina parničnog i/ili upravnog postupka)

Broj aplikacije Datum podnošenja	Aplikant Datum rođenja	Početak postupka ili datum stupanja Konvencije na snagu za Bosnu i Hercegovinu (12.07.2002.)	Završetak postupka	Ukupna dužina Nivoi nadležnosti
14769/15 12/03/2015	Jelenko Grahovac 19/04/1970	12/07/2002	24/02/2017	14 godina i 7 mjeseci i 13 dana 3 nivoa nadležnosti